

**Bil. 34**

**Isnin**

**14 Oktober 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT KETIGA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Klinik Kesihatan USJ 1**  
- YB. Tuan Wong Chen (*Subang*) [Halaman 1]
- **Unit Transformasi Masyarakat India (MITRA)**  
- YB. Dato' Seri Dr. Santhara (*Segamat*) [Halaman 2]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT KETIGA**

**Isnin, 14 Oktober 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Tuan Nga Kor Ming)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Klinik Kesihatan USJ 1**

**2.33 ptg.**

**Tuan Wong Chen [Subang]:** Terima kasih Tuan Yang di-Pertua, soalan saya ini memang padat dan ringkas. Soalan saya kepada Menteri Kesihatan adalah seperti berikut:

- (a) apakah status projek Klinik Kesihatan USJ 1; dan
- (b) apakah bajet dan jangka masa projek ini; dan,
- (c) justifikasikan jangka masa tersebut.

Sekian, terima kasih.

**2.34 ptg.**

**Timbalan Menteri Kesihatan [Dr. Lee Boon Chye]:** Terima kasih Yang Berhormat Subang. Tuan Yang di-Pertua, Kementerian Kesihatan Malaysia sedia maklum akan keperluan untuk membina sebuah klinik kesihatan di Subang Jaya. Sehubungan ini, Kementerian Kesihatan Malaysia telah mengenal pasti sebidang tanah seluas tiga ekar milik Kementerian Pendidikan Malaysia di USJ 1 untuk ditukar guna menjadi sebagai tapak klinik kesihatan. Proses tukar guna telah dimulakan sejak 2017 dan selesai pada tahun ini, 2019.

Selanjutnya, dengan selesainya proses tukar guna tanah ini, langkah seterusnya adalah mengenal pasti jenis klinik serta skop perkhidmatan yang diperlukan bagi cadangan pembinaan klinik tersebut. Cadangan projek ini akan dikemukakan di bawah Rancangan Malaysia Ke-12 akan

datang. Projek dijangka siap dalam tempoh antara empat hingga empat setengah tahun selepas dari tarikh kelulusan peruntukan ditentukan.

Skop perkhidmatan yang dicadangkan adalah:

- (i) Klinik Perubatan Keluarga;
- (ii) Klinik Kesihatan Ibu dan Anak;
- (iii) Klinik Warga Sihat;
- (iv) Klinik Pesakit Luar;
- (v) Bilik Kecemasan;
- (vi) Klinik Pergigian;
- (vii) Pendidikan dan promosi kesihatan komuniti;
- (viii) Rehabilitasi dan cara pulih anggota;
- (ix) Makmal perubatan;
- (x) Farmasi;
- (xi) Radiologi;
- (xii) Rekod kesihatan;
- (xiii) Pentadbiran; dan
- (xiv) Kemudahan awam.

Dengan adanya kemudahan klinik kesihatan ini, diharapkan dapat menampung keperluan penduduk di kawasan USJ 1 yang semakin bertambah selaras dengan pembangunan yang pesat di kawasan tersebut. Sekian, terima kasih.

### **Unit Transformasi Masyarakat India (MITRA)**

**2.40 ptg.**

**Dato' Seri Dr. Santhara [Segamat]:** Terima kasih Tuan Yang di-Pertua. Seperti mana yang diketahui umum, kerajaan sebelum ini telah memperkenalkan Unit Pembangunan Sosioekonomi Masyarakat India (SEDIC) di bawah pengawasan Pejabat Perdana Menteri yang kini dikenali sebagai Unit Transformasi Masyarakat India (MITRA). Matlamat utama MITRA adalah untuk meningkatkan taraf sosioekonomi kaum India di Malaysia.

Ini merupakan satu hasrat murni kerajaan untuk memastikan masyarakat India di Malaysia. Namun, terdapat banyak persoalan yang timbul mengenai peruntukan yang ditetapkan dan juga berkenaan pengagihan dan pengendalian projek ini. Berapakah jumlah bersih peruntukan yang telah diluluskan oleh Kerajaan Persekutuan untuk Unit Transformasi Masyarakat India (MITRA)

sehingga kini? Berdasarkan peruntukan yang telah diluluskan, berapakah jumlah peruntukan yang telah disampaikan kepada MITRA dan seterusnya disalurkan kepada badan-badan bukan kerajaan (NGO) yang menjalankan program-program untuk menaik taraf tahap sosioekonomi masyarakat India?

Diminta juga penjelasan mengenai kumpulan sasaran, Petunjuk Prestasi Utama (KPI) dan tahap kecemerlangan program ini serta maklumat mengenai sektor-sektor yang menjadi fokus untuk peruntukan ini. Jika pihak kerajaan bercadang untuk mengekalkan MITRA, berapakah peruntukan yang akan diluluskan oleh kerajaan untuk program MITRA untuk tempoh masa lima tahun yang akan datang? Sila juga jelaskan mengenai sektor-sektor sosioekonomi yang akan dititikberatkan oleh kerajaan dan apakah langkah-langkah yang akan diambil untuk memantau, mengurus dan mengawal peruntukan ini supaya tidak disalahgunakan.

Adakah pihak kementerian telah membuat siasatan atau '*post-mortem*' terhadap MITRA untuk mengenal pasti kelemahan-kelemahan dan jika ada sebarang penyalahgunaan peruntukan? Jika ya, mohon untuk memberikan ulasan lanjut mengenai penyalahgunaan yang dikenal pasti dan maklumat seperti jumlah, nama projek, pengendali projek dan sebagainya. Namun, terdapat banyak persoalan yang timbul mengenai keberkesanan inisiatif yang diambil oleh MITRA. Pihak JPM diminta mengulas jika MITRA mempunyai kepakaran yang sesuai untuk melaksanakan projek-projek pembangunan sosioekonomi untuk kaum India dan apakah projek-projek yang bakal dilaksanakan untuk tahun 2020?

Diminta juga penjelasan mengenai jumlah peruntukan yang diberi kepada MITRA untuk bidang pendidikan dan pelan terperinci MITRA untuk membantu pelajar-pelajar India dari matrikulasi, politeknik, IPTA dan IPTS. Berapakah jumlah peruntukan atau bajet untuk sektor pendidikan untuk sesi 2020/2021? Terima kasih.

## **2.39 ptg.**

**Menteri di Jabatan Perdana Menteri [Tuan Waytha Moorthy a/l Ponnusamy]:** Terima kasih Tuan Yang di-Pertua dan terima kasih Yang Berhormat Segamat atas soalan yang panjang yang juga memerlukan banyak maklumat ini.

Untuk makluman Yang Berhormat, selepas peralihan kepada kerajaan baharu, Unit Pembangunan Sosioekonomi Masyarakat India (SEDIC) telah dijenamakan semula sebagai Unit Transformasi Masyarakat India (MITRA) mulai Disember 2018. MITRA telah diberi peruntukan sebanyak RM100 juta bagi tahun 2019 dan sehingga 6 September 2019, MITRA dan Jabatan Perdana Menteri telah meluluskan sejumlah RM60,397,212.20 yang merangkumi 161 NGO yang akan melaksanakan program-program pembangunan sosioekonomi masyarakat India.

**■1440**

Daripada jumlah yang telah diluluskan itu, kerajaan telah menyalurkan sejumlah RM31,496,116 kepada 89 NGO. Turut dimaklumkan bahawa sehingga 27 Disember 2019, sebanyak 50 lagi permohonan yang berjumlah RM34,217,190 telah diluluskan di peringkat MITRA dan kini dalam pertimbangan Bahagian Pembangunan, Jabatan Perdana Menteri.

Ingin saya jelaskan bahawa MITRA hanya bertanggungjawab untuk menerima dan memproses permohonan pemberian geran kepada NGO atau entiti untuk tujuan pembangunan kapasiti dan latihan. Tanggungjawab untuk mengagihkan peruntukan kepada NGO-NGO dan entiti adalah dilaksanakan oleh JPM. Ini adalah kerana MITRA tidak berstatus pusat tanggungjawab (PTJ) untuk mengendalikan hal-hal berkaitan penyaluran kewangan dan perakaunan.

Kumpulan sasar utama bagi program-program yang dilaksanakan melalui peruntukan MITRA kepada NGO adalah tertumpu kepada golongan B40 di kalangan masyarakat India iaitu bagi isi rumah yang berpendapatan kurang daripada RM3,000. Golongan B40 ini turut merangkumi kategori kanak-kanak, pelajar, belia, ibu bapa, ibu atau bapa tunggal, wanita, golongan kurang upaya, warga emas dan komuniti yang berisiko tinggi (*high risk community*).

Selaras dengan penjenamaan semula MITRA, pengurusan tertinggi MITRA telah membangunkan visi, misi, nilai-nilai organisasi dan objektif serta yang paling ditekankan ialah penelitian terhadap petunjuk prestasi utama (KPI) untuk setiap teras utama MITRA iaitu:

- (i) Dasar dan perancangan;
- (ii) Pendidikan dan latihan;
- (iii) Ekonomi dan kerjaya;
- (iv) Kebajikan dan pembangunan sosial;
- (v) Identiti dan keterangkuman; dan
- (vi) Projek khas.

Bagi tahun ini, Program Pembangunan Sosioekonomi telah diluluskan bermula bulan Jun 2019 dan pelaksanaannya pula bermula bulan Julai 2019. Justeru, penilaian keberkesanan dan impak program di jadual untuk dilaksanakan pada hujung tahun ini dan awal tahun hadapan. Kerajaan amat komited dalam memantapkan pengoperasian MITRA agar ianya berfungsi secara optimum untuk menerajui pembangunan dan membawa perubahan kepada masyarakat India di Malaysia dalam pelbagai aspek seperti modal insan, pendidikan, ekonomi dan sebagainya.

Berkaitan itu, di bawah Belanjawan 2020 yang dibentangkan baru-baru ini, kerajaan telah memperuntukkan sejumlah RM100 juta kepada MITRA bagi pelaksanaan program-program pembangunan sosioekonomi yang membantu meningkatkan taraf hidup masyarakat India. Selain itu, kerajaan juga memperuntukkan pinjaman sebanyak RM20 juta di bawah Skim Pembangunan

Usahawan Masyarakat India melalui TEKUN Nasional yang dijangka memberi manfaat kepada lebih kurang 1,300 usahawan India dengan kadar faedah sebanyak 4 peratus setahun.

Di samping itu, bagi memastikan sekolah-sekolah sedia ada menyediakan persekitaran pembelajaran yang lebih kondusif untuk anak-anak masyarakat India, kerajaan memperuntukkan sejumlah RM50 juta bagi penyelenggaraan dan menaik taraf sekolah jenis kebangsaan Tamil (SJKT). Ini jelas menunjukkan komitmen kerajaan terhadap kemajuan masyarakat India dalam rancangan jangka masa panjang.

Ahli Yang Berhormat, peruntukan-peruntukan yang telah saya nyatakan di atas adalah di bawah perancangan tahun 2020. Bagi maksud perancangan pasca tahun 2020, kerajaan melalui MITRA sedang melaksanakan beberapa sesi libat urus bersama komuniti perniagaan, sektor swasta, ahli-ahli akademik dan beberapa kumpulan profesional yang lain untuk merangka pelan pembangunan yang komprehensif bagi masyarakat India. Peruntukan bagi perancangan ini akan dinyatakan melalui Rancangan Malaysia Ke-12 yang akan diumumkan dengan inisiatif Wawasan Kemakmuran Bersama.

Untuk makluman Ahli Yang Berhormat selanjutnya, pada masa ini MITRA memberi penekanan penuh kepada aspek pembasmian kemiskinan melalui fokus utama iaitu pendidikan dan peningkatan ekonomi serta kerjaya yang menyasarkan pelbagai lapisan masyarakat. Kepentingan pendidikan adalah amat nyata dan jelas di mana golongan yang menerima pendidikan berkualiti secara lazimnya mempunyai peluang dan ruang yang lebih luas untuk mengecap kehidupan serta pendapatan yang lebih baik.

Selain itu, pendidikan bukan sahaja dapat meningkatkan produktiviti dan kemajuan ekonomi sesuatu negara, malahan jurang perbezaan sosioekonomi dan politik juga dapat dirapatkan. Ingin saya tekankan bahawa pendidikan merupakan wadah bagi meningkatkan status sosioekonomi di kalangan golongan B40 masyarakat India di Malaysia.

Dalam pada waktu, fokus terhadap aspek ekonomi dan kerjaya adalah amat penting untuk memperbaiki taraf kehidupan masyarakat agar sejajar dengan agenda negara. Ia harus mengambil kira persekitaran perniagaan yang terkini dan model pekerjaan baru yang menjurus kepada Revolusi Industri 4.0 atau IR 4.0. Semua ini akan mewujudkan penglibatan yang lebih menyeluruh dalam bidang keusahawanan serta meningkatkan kadar kebolehpasaran atau dengan izin *employability* di kalangan masyarakat India di Malaysia. Secara tidak langsung, masyarakat India di negara akan akhirnya berupaya untuk keluar dari kepompong perbezaan sosial dan ekonomi serta maju ke hadapan dengan jayanya.

Ahli Yang Berhormat, berdasarkan kepada Laporan Ketua Audit Negara tahun 2018 siri 1, prestasi pengurusan Program Pembangunan Sosioekonomi Masyarakat India (PPSMI) yang

dilaksanakan oleh SEDIC sebelum ini bagi tempoh 2014 hingga 2018 dalam kerajaan terdahulu adalah tidak memuaskan dan terdapat salah laku. Tiada rekod dan pangkalan data yang lengkap diselenggarakan untuk menilai pencapaian *outcome*.

Di samping itu, didapati bahawa perbelanjaan dana kerajaan berjumlah RM38.15 juta yang disalurkan kepada ICU JPM adalah berdasarkan kepada permohonan oleh mantan Yang Berhormat Menteri Kesihatan, mantan Timbalan Menteri di JPM dan SEDIC sendiri. Laporan audit juga jelas menyatakan pelbagai ketidakpatuhan terhadap proses dan prosedur, kelemahan dari segi penilaian, pemilihan NGO, pemantauan terhadap pelaksanaan dan perbelanjaan program serta wujud kelemahan tadbir urus dan isu percanggahan kepentingan yang melibatkan anggota-anggota pentadbiran terdahulu iaitu mantan Menteri dan mantan Timbalan Menteri seperti yang dinyatakan di atas dan oleh pengurusan SEDIC sendiri.

Ahli Yang Berhormat, bagi tujuan mempertingkatkan tadbir urus yang melibatkan pemberian geran kewangan, bermula tahun ini MITRA telah melaksanakan tindakan kawalan dan pengesanan secara dalaman di mana setiap 211 NGO yang telah diluluskan untuk penerimaan geran akan dipantau dengan berpanduan kepada manual pelaksanaan sistem geran MITRA. Manual tersebut dibangunkan untuk memastikan proses pemilihan, kelulusan geran dan pemantauan program dilaksanakan secara teratur serta bagi memastikan penggunaan geran oleh penerima geran adalah diurus dengan lebih telus dan berintegriti.

Berdasarkan kepada langkah pemantauan tersebut, tiada elemen penyalahgunaan di peringkat NGO atau entiti yang dikenal pasti oleh MITRA sehingga kini.

#### ■1450

Pada masa ini, MITRA mempunyai 28 tenaga kerja yang terdiri daripada 40 peratus kumpulan pengurusan dan 60 peratus kumpulan pelaksana. Komposisi di peringkat kumpulan pengurusan MITRA merangkumi pakar-pakar daripada sektor kerajaan, sektor swasta dan badan bukan kerajaan (NGO). Manakala kumpulan pelaksana adalah kebanyakannya dari kalangan graduan baru yang pernah bekerja di bawah pentadbiran terdahulu.

Dari segi kepakaran di peringkat kumpulan pengurusan, kakitangan dari sektor swasta dilantik dari kalangan mereka yang mempunyai pengalaman meluas dalam pelbagai bidang seperti elektronik, pembuatan, teknologi, *oil* dan *gas* dan makanan. Kakitangan yang mempunyai latar belakang NGO pula adalah terdiri daripada individu yang arif dalam pelaksanaan program-program bertaraf nasional bagi pembangunan sosioekonomi masyarakat India Malaysia. Pelantikan bagi kakitangan dari sektor kerajaan pula merangkumi Skim Pegawai Tadbir dan Diplomatik dan Skim Pegawai Perkhidmatan Pendidikan yang berpengetahuan dan berpengalaman dalam memastikan pelaksanaan MITRA adalah selari dengan hasrat dan dasar kerajaan.



Untuk makluman Ahli Yang Berhormat juga, bagi memastikan pengoperasian dan pengurusan MITRA adalah secara optimum dan berkesan, organisasi ini memerlukan sekurang-kurangnya 150 kakitangan di peringkat Persekutuan, negeri dan kawasan-kawasan Parlimen. Keperluan ini akan membolehkan MITRA menjalankan fungsi-fungsi perancangan, pelaksanaan dan pemantauan terhadap inisiatif-inisiatif yang disasarkan kepada golongan B40 secara menyeluruh sebagai agenda utamanya.

Seperti yang telah dinyatakan, MITRA kini mengalami kekangan tenaga kerja yang ketara dan perkara ini perlu diselesaikan segera. Selain itu, saya turut berpandangan bahawa dasar kerajaan dalam pengurangan penjawat awam secara tidak langsung telah menjadi halangan utama bagi MITRA untuk mendapatkan tenaga kerja yang optimum. MITRA telah memperuntukkan sejumlah RM40 juta daripada jumlah peruntukan pembangunan bagi tahun 2019 untuk bidang pendidikan. Peruntukan ini akan digunakan untuk pelbagai tujuan berkaitan pendidikan yang meliputi program serta aktiviti bimbingan kanak-kanak prasekolah, dengan izin *Technical and Vocational Educational Training* (TVET) dan pembelajaran seumur hidup.

MITRA memastikan bahawa penganjur-penganjur program pendidikan seumpama ini mempunyai akreditasi yang sewajarnya di peringkat nasional atau antarabangsa. Berkaitan itu, MITRA telah mendapatkan kelulusan terhadap dengan izin *notice of change* daripada Kementerian Hal Ehwal Ekonomi pada bulan Jun 2019 dan kini sedang bekerjasama dengan beberapa institusi pendidikan berkaitan strategi pembayaran oleh MITRA yang dijangka akan memanfaatkan golongan B40 masyarakat India di Malaysia.

Sekian sahaja jawapan saya berhubung usul yang dibangkitkan oleh Yang Berhormat. Sekiranya Yang Berhormat memerlukan sebarang maklumat yang berkait rapat berhubung MITRA, saya sentiasa mengalu-alukan pertemuan bersama Yang Berhormat. Sekian, terima kasih.

**Timbalan Yang di-Pertua [Tuan Nga Kor Ming]:** Terima kasih Yang Berhormat Menteri atas jawapan yang komprehensif. Ahli-ahli Yang Berhormat, mesyuarat Kamar Khas hari ini ditangguhkan pada pukul 2.30 petang, hari Selasa, 15 Oktober 2019.

***[Kamar Khas ditangguhkan pada pukul 2.54 petang]***